



**ORDINAN 41 TAHUN 2001**  
**ORDINAN MAJLIS ISLAM SARAWAK, 2001**

**BAHAGIAN V - PENUBUHAN LEMBAGA BAITULMAL DAN WAKAF, BAITULMAL, WAKAF DAN NAZR**  
**Penubuhan dsb., Baitulmal dan Caruman-Caruman kepadanya**

---

**Seksyen 48. Caruman kepada Baitulmal oleh majikan-majikan berkenaan dengan pekerja-pekerja beragama Islam.**

(1) Tertakluk kepada Ordinan ini dan mana-mana kaedah-kaedah yang dibuat di bawah seksyen 82, tiap-tiap majikan seseorang pekerja Islam hendaklah membayar kepada Baitulmal caruman pada tiap-tiap bulan bagi setiap orang pekerja beragama Islam itu sebanyak amaun mengikut emolumennya bagi bulan tertentu pada kadar yang dinyatakan dalam Jadual.

(2) Walau apa pun mana-mana undang-undang bertulis atau apa-apa kontrak yang berlawanan, seseorang majikan adalah berhak untuk mendapatkan balik daripada emolumen pekerja beragama Islam itu amaun apa-apa caruman yang telah dibayar kepada Baitulmal bagi pihak pekerjanya itu.

(3) Seseorang majikan yang gagal membayar caruman-caruman yang disebutkan dalam subseksyen (1) kepada Baitulmal dalam tempoh masa yang ditetapkan itu adalah melakukan suatu kesalahan dan boleh apabila disabitkan dikenakan denda tidak melebihi lima ratus ringgit .

(4) Seseorang majikan yang telah mendapatkan balik apa-apa amaun caruman daripada emolumen seseorang pekerja Islam mengikut subseksyen (2) dan gagal membayar caruman yang didapatkan balik itu kepada Baitulmal dalam masa yang ditetapkan itu adalah melakukan suatu kesalahan dan boleh apabila disabitkan dikenakan denda tidak melebihi dua ribu ringgit.

(5) Walau apa pun subseksyen (6), Yang di-Pertua Negeri boleh, dari semasa ke semasa, melalui pemberitahuan dalam Warta, mengubahkan amaun caruman yang dinyatakan dalam jadual dan boleh menetapkan amaun-amaun caruman yang berlainan yang kena dibayar oleh majikan bagi golongan-golongan pekerja Islam yang berlainan.

(6) Tanpa menyentuh subseksyen (1) dan (2),-

(a) seseorang pekerja boleh pada bila-bila masa mencarum dengan sukarela kepada Baitulmal sejumlah wang sebagai tambahan kepada caruman yang disebutkan dalam subseksyen (1) yang kena dibayar oleh majikan; atau

(b) seseorang pekerja boleh memilih untuk mencarum melebihi amaun yang dipotong daripada emolumennya setiap bulan dengan memberi notis bertulis kepada majikannya dengan menyatakan maksudnya yang sedemikian, dan majikan itu hendaklah membuat potongan bulanan itu seolah-olah kadar caruman yang pekerja itu telah pilih untuk dibuat bayaran ialah kadar yang ditetapkan dalam Jadual dan majikan itu hendaklah meremitkan amaun potongan yang lebih itu kepada Baitulmal, selain caruman bulanan yang berkenaan bagi pekerja itu:

Dengan syarat bahawa seseorang pekerja boleh pada bila-bila masa berhenti membuat potongan bulanan yang berlebihan itu atau membatalkan pilihan yang dibuat di bawah perenggan (a) dan (b) dengan memberi notis bertulis lagi, tidak boleh kurang daripada enam bulan dari tarikh pemberian notis itu, kepada majikannya menyatakan hasratnya hendak menghentikan potongan.

(7) Apa-apa caruman yang boleh didapatkan balik daripada emolumen seseorang pekerja mengikut subseksyen (2) hendaklah didapatkan balik oleh majikan daripada emolumen yang berkenaan dengannya caruman itu adalah kena dibayar pada masa pembayaran emolumen itu atau dalam masa yang ditetapkan dan bukannya dengan cara lain.

#### **Seksyen 49. Caruman daripada orang-orang lain kepada Baitulmal.**

(1) Walau apa pun seksyen 48, Majlis boleh-

(a) menerima caruman-caruman sukarela daripada orang-orang beragama Islam untuk mencarum kepada Baitulmal; dan

(b) dengan kelulusan Yang di-Pertua Negeri, melalui perintah yang disiarkan dalam Warta, menghendaki mana-mana orang beragama Islam atau golongan orang beragama Islam supaya membayar caruman bulanan kepada Baitulmal sebanyak amaun yang ditetapkan.

(2) Tiada apa-apa jua dalam Bahagian ini boleh ditafsirkan sebagai mengecualikan Majlis daripada menerima caruman daripada mana-mana orang yang bukannya penganut agama Islam sebagai caruman kepada Baitulmal.

#### **Seksyen 50. Caruman oleh majikan beragama Islam.**

Tiap-tiap majikan yang beragama Islam adalah dikehendaki membayar caruman bulanan kepada Baitulmal mengikut apa-apa kadar yang dinyatakan dalam Jadual dan peruntukan-peruntukan Bahagian ini hendaklah secara mutatis mutandis terpakai dengan sewajarnya.

#### **JADUAL (Seksyen 48(1) dan 50)**

#### **KADAR-KADAR CARUMAN BAGI SEBULAN**

(1) Pekerja:

Amaun Emolumen Sebulan

Kadar Caruman Sebulan

Melebihi RM300 tetapi tidak melebihi RM1,000

RM1.00

Melebihi RM1,000 tetapi tidak melebihi RM2,000

RM2.00

Melebihi RM2,000

RM4.00

(2) Majikan:

Bagi majikan yang beragama Islam

RM5.00

Jenis Sumbangan	Bilangan Penyumbang	Jumlah Sumbangan ( RM )		
		WAJIB	SUKARELA	JUMLAH
<b>1. MAJIKAN BERAGAMA ISLAM</b> pada kadar RM 5.00 seorang sebulan				
<b>2. PEKERJA BERAGAMA ISLAM</b> Dimana gaji bulan melebihi RM300.00 hingga RM1,000.00 pada kadar RM1.00 seorang sebulan				
Dimana gaji bulan melebihi RM1,000.00 hingga RM2,000.00 pada kadar RM2.00 seorang sebulan				
Dimana gaji bulan melebihi RM2,000.00 pada kadar RM4.00 seorang sebulan				
<b>3. PENYUMBANG SUKARELA YANG BUKAN BERAGAMA ISLAM</b>				

\* Gaji termasuk pendapatan pokok dan elau bulanan tetap, jika ada